

14th April 2025 **09-20** Hrs

Headlines

- समूलचा मुख अज्ज भारतीय संविधान दे रचेयता भारत रत्न बाबा साहेब भीम राव अम्बेडकर होरें गी उंदी 134मीं जन्म जयंति दे मौके पर श्रद्धांजलि अर्पित करै करदा ऐ।
- अम्बेडकर जयंति दे मौके पर प्रधानमंत्री नरेन्द्र मोदी होरें केई विकास परियोजनाएं दी शुरूआत करगन।
- उपराज्यपाल मनोज सिन्हा होरें आखेआ जे हर डुंगर वासी गी अपनी संस्कृति ते परम्पराएं पर मान करना लोड़चदा।
- आईपीएल च कल मुंबई इंडियन्स नै दिल्ली कैपिटल्स गी 12 रंजें कन्नै ते रॉयल चैलेंजर्स बेंगलुरु नै राजस्थान रॉयल्स गी हराया।

<><><><><><>

Ambedkar Jayanti

देस अज्ज भारतीय संविधान दे मुख निर्माता डॉ. बी.आर.अम्बेडकर होरें गी हुंदी 134मीं जयंति दे मौके उनेंगी श्रद्धांजलि अर्पित करा करदा ऐ। इस मौके समूलचे देसै च नेके कार्यक्रमें दा सरिस्ता कीता जा करदा ऐ। राष्ट्रपति द्रौपदी मुर्मू, उपराष्ट्रपति जगदीप धनखड़, प्रधानमंत्री नरेन्द्र मोदी, लोकसभा अध्यक्ष ओम बिरला, मंत्री, संसद ते होर दुए मन्ने परम्मने दे लोकें अज्ज बडलै संसद भवन परिसर च बाबा साहेब हुंदी प्रतिमा पर फुल्ल चाढ़ा करदे न। बाबा साहेब होरें नेकां भूमका नभाइयां न जियां जे समाज सुधारक, अर्थशास्त्री, सियासतदा। उनें अपना जीवन लोकें दे नमित कीता। बाबा साहेग भीम राव अम्बेडकर होरें समाज दे हाशियै पर खड़ोते दे वर्गे खिलाफ समाजी ते जातिगत फर्कोफर्की खत्म करने लेई जीवन भर कम्म कीता। उनें आजाद भारत दे पैहले कनून ते न्याह मंत्री बने। 1990 च मरणोपरांत उनेंगी भारत दे सब्बने शा बड्डे नागरिक सम्मान शा बड्डे नागरिक सम्मान भारत रत्न कन्नै सम्मानत कीता गेआ।

<><><><><><>

President- Ambedkar

राष्ट्रपति द्रौपदी मुर्मू होरें डॉ. बी.आर.अम्बेडकर हुंदी जयंति पर लोकें गी शुभकामनां दित्तियां न। राष्ट्रपति होरें अपने सनेए च आखेआ जे अपने प्रेरक जीवन च बाबा साहेब होरें बड़ी मती दिक्कतें—परेशानिएं दा सामना करदे होई बी अपनी इक बक्खरी पंछान बनाई ते अपने बेजोड़ उपलब्धिएं कन्नै दुनिया भर च मान हासल कीता।

<><><><><><>

PM-Ambekar

प्रधानमंत्री नरेन्द्र मोदी होरें अल्ल बाबा साहेब बी.आर.अम्बेडकर होरें गी उंदी 134 जयंति दे मौके उनेंगी श्रद्धांजलि भेंट कीती। इक ट्वीट च श्री मोदी होरें आखेआ जे बाबा साहेब हुंदी प्रेरणा करियै गै अज्ज देस समाजी न्याह दे सुखने गी सच्च करने च समर्पित भाव कन्नै जुटे दा ऐ। प्रधानमंत्री होरें आखेआ जे डॉ. अम्बेडकर हुंदे सिद्धांत, आदर्श, आत्मनिर्भर ते विकसित भारत दे निर्माण गी बल ते रफ्तार प्रदान करगन।

<><><><><><>

PM-Haryana

प्रधानमंत्री नरेन्द्र मोदी होर अज्ज अम्बेडकर जयंति दे मौके पर हरियाणा दा दौरा लांगन ते हिसार थमां अयोध्या लेई कारोबारी डोआरी गी सैल्ली झंडी दस्सगन। एह्दे कन्नै गै ओह हिसार हवाई अड्डे दी नमीं टर्मिनल इमारत दा नीह पत्थर बी रक्खगन। श्री मोदी हुंदा इक जनसभा गी संबोधत करने दा बी कार्यक्रम ऐ। एह्दे मगरा प्रधानमंत्री यमुनानगर च विकास परियोजनाएं दा उद्घाटन ते नीह पत्थर रक्खगन। गोबर्धन योजना दे नजरियै गी अगगे बंधंदे होई प्रधानमंत्री यमुनानगर दे मुकराबपुर च इक बायोगैस प्लांट दी बी आधारशिला रक्खगन।

<><><><><><>

LG-Ambekar

उपराज्यपाल मनोज सिन्हा होरें बी डॉ. बी.आर.अम्बेडकर हुंदी जयंति दी पूर्व संध्या पर लोकें गी शुभकामनां दित्तियां न। आकाशवाणी दे जम्मू संवाददाता नै दस्सेआ जे उपराज्यपाल होरें अपने सनेए च अम्बेडकर होरेंगी भारतीय संविधान दा मुख निर्माता दस्सदे होई गलाया जे उनें भारत दे भविक्ख गी आकार देने च महत्वै आली भूमिका नभाई ते साढ़े राश्ट्री जीवन ते समाज पर कदें नेई मितने आली छाप छोड़ी। श्री सिन्हा होरें लोकेंअगगे अपील कीती जे ओह बाबा साहेब हुंदे महान अनमूले गी बनाई रखदे होई इकजुट्ट, बरोबर न्याहपूर्ण ते मानवीय समाज दे निर्माण लेई रलियै कम्म करन।

<><><><><><>

CM-Ambekar

मुख्यमंत्री उमर अब्दुल्ला होरें भारत रत्न भीम राव अम्बेडकर हुंदी जयंति पर लोकें गी दिली ममारकबाद दित्ती ते भारतीय संविधान दे मुख निर्माता गी श्रद्धांजलि बी दित्ती। अपने सनेए च मुख्यमंत्री होरें आखेआ ऐ जे बाबा साहेब होरें अपना पूरा जीवन समाज दे दबे—लतड़ोए ते हाशियै पप रवा'रदे लोकें गी उबड़ा चुक्कने लेई समर्पित कीता हा।

<><><><><><>श

Bus- Nowshera

उपमुख्यमंत्री सुरिंदर चौधरी होरें जम्मू थमां नौशेहरा वाया सेरी बस सेवा गी कल सैल्ली झंडी दस्सियै रवाना कीता। इस मौके पर बोलदे होई उपमुख्यमंत्री होरें आखेआ जे जम्मू थमां नौशेरा लेई हर ध्याड़े चलने आली इस बस सेवा गी लाह पुज्जोग, जिनेंगी पैहले मती दिक्कतें परेशानिएं दा सामना करना पौंदा हा। श्री चौधरी होरें आखेआ जे मकामी लोकें दी लम्मे सिरे थमां बकाया पेदी मंग ही, जिसी पूरा करी दित्ता गेआ ऐ। उनें संदोख प्रगट कीता जे सरकार आम लोकें दिएं आस—मेदें गी पूरा करने च समर्थ ऐ।

<><><><><><>

Tawi Arti(byte)

उपराज्यपाल मनोज सिन्हा होरें आखेआ जे मंदरें दे शैहर जम्मू दियां जीवंत परम्परां कुसै गी बी आध्यात्मिक ते आलोकिक आनंद गी मसूसनें दा मौका देने दी छमता रखदियां न ते इत्थें औने आला हर कोई इस आनंद गी मसूस करै एह्दे लेई जम्मू दे लोकें गी आपूं इस नंद गी मसूस करदे होई अपनियां परम्पराएं पर मान करना लोड़चदा। उपराज्यपाल होरें एह् गल्ल कल संजा बसाखी दे मौके पर जम्मू च तवि रिवर फ्रंट पर आयोजित सूरजे पुत्री तवि आरती च हिस्सा लेंदे मौके आक्खी। इस आरती च खरी मती गिनतरी च लोक शामिल होए। इस दरान चबक्खियां बड़ा गै आलोकिक ते मन परचाई लैने आला म्होल बनी गेदा हा।

आरती—2

इस मौके पर मजूद युवा सेवाएं ते खेड्डें सरबंधी मी सतीश शर्मा होरें इस आयोजन दी सराहना करदे होइ आखेआ

सूरजपुत्री तवि आरती दा सरिस्ता जम्मू जिला प्रशासन, सैलसफा मैह्कमे, जम्मू स्मार्ट सिटी लिमिटेड ते जम्मू नगर निगम आस्सेआ रलियै कीता गेदा हा। जम्मू स्मार्ट सिटी लिमिटेड दे मुख कार्जकारी अधिकारी देवांश यादव होरें दस्सेआ जे भविक्ख च बी इस चाल्ली दे आयोजन कीते जांगन। उनें जम्मू वासिएं गी अपील कीती जे मते मते लोकें ते सैलानी इस चाल्ली दे समारोह च शामिल होन तां जे जम्मू शैहरा दी पंछान दूरै दूरै तगर पुज्जे। कल इस आरती च कोई 5 ज्हार कोला मते लोक शामिल होए।

<><><><><><>

General Zorawar Singh(byte)

“भारत दे नैपोलियन” खोआने आले जनरल जोरावर सिंह हुंदी 241मीं जयंति कल मते जोश जज्बे कन्नै मनाई गई। इस सिलसिले च जम्मू कश्मीर एक्स सर्विसमेन लीग आस्सेआ जनरल जोरावर सिंह चौक बाहु प्लाजा च

इक कार्यक्रम दा सरिस्ता कीता गेआ। इस मौके 19 जम्मू कश्मीर राइफल्स आस्सेआ उनेंगी रस्मी तौरा पर सम्मान पेश कीता गेआ ते उंदे जीवन ते उपलब्धिएं पर लोह पाई गई.....बाईट

इस मौके मंत्री सतीश शर्मा होरें मुख्ख परौहने दे तौरा पर मजूद हे। मेजर जनरल रिटायर्ड गोर्वधन सिंह जम्वाल होरें आखेआ जे जनरल जोरावर सिंह हुंदे कारनामें इन्नै बुलंद मे मकबूल हे जे उनेंगी भारत दा नैपोलियन आखने दे बजाए नैपोलियन गी फ्रांस दा जोरावर आखेआ जाना लोड़चदा।

<><><><><><>

LG-GMCs

उपराज्यपाल मनोज सिन्हा होरें कल राजभवन च पूरे जम्मू कश्मीर दे सरकारी मैडिकल कालेज ते डाक्टरी संस्थानें दे अध्यक्षें कन्नै गल्लबात कीती। इस मौके उनें चेचे तौरा पर लिवर यानि जिगर दिएं बमारिएं बारे चर्चा कीती जिस सरबंधी समस्यां अज्ज कल आम लोकें च दिक्खने च लब्धियां न। इस मौके उपराज्यपाल होरें सरबंधत सब्बने धड़ें गी सलाह दित्ती जे ओह सरकारी मैडिकल कालेजें, एम्स, शोरे कश्मीर मैडिकल संस्थान ते होरने सेहत इदारें दे कन्नो कन्नी ओह जिगर ते पित्ते सरबंधी विज्ञान संस्थान दे डरैक्टर डॉ. शिव कुमार सरीन हुंदे नै नेड़मा तालमेल कीता जाई सकै। इस मौके बैठका च उपराज्यपाल हुंदे प्रधान सचिव डॉ. मंदीप भंडारी, सेहत ते मैडिकल शिक्षा दे सचिव डॉ. सेयद आबिद रशीद, एम्स जम्मू दे कार्जकारी निदेशक प्रो. डॉ. शक्ति कुमार गुप्ता ते होर केई अधिकारी मजूद हे।

<><><><><><>

IPL

कल रातीं दिल्ली दे अरुण जेटली स्टेडियम च खेड़डे गेदे आईपीएल मैच च मुंबई इंडियन्स नै दिल्ली कैपिटल्स गी 12 रंजें कन्नै हराई दित्ता। तिलक वर्मा दे 59 रंजें दी बदोलत कन्नै मुंबई इंडियन्स नै 205 रंज बनाए। रिकल्टन, सूर्य कुमार यादव ते नमन होरें बी उपयोगी योगदान दित्ता। परते च दिल्ली कैपिटल्स दे करुण नायर दी 49 गेदें च 89 रंजे दी पारी दे बावजूद दिल्ली कैपिटल्स 193 रंजें पर गै ऑल आउट होई गई। कल खेड़डे गेदे दुए मैच च रॉयल चैलेंजर्स बैंगलुरु नै राजस्थान रॉयल्स गी 9 विकटें कन्नै हराया। अज्ज लखनऊ सुपर जायंट्स दा मकाबला चेन्नई सुपर किंग्स कन्नै होग ते मैच साढ़े 7 बजे शुरू होग।

<><><><><><>